

福建叢書 第一輯之六

福建省文史研究館編

明·晉江
黃克纘撰

數馬集

(四)



福建叢書 第一輯之六

福建省文史研究館編

明·晉江
黃克纘撰

數

馬

集

(四)

江蘇廣陵古籍刻印社

数 马 集

(明) 黄克缵 撰

江苏广陵古籍刻印社 出版发行

扬州市凤凰桥 24—6 号

金坛市古籍精装印务有限公司印装

开本: 850 × 1168 1/32 印张: 76

1997 年 3 月第一版 1997 年 3 月第一次印刷

印数: 1—350

广陵编号: 97XZ · 195 定价: (精 4 册) 280 元

數馬集卷之二十九

溫陵黃克纘紹夫著

書

東李九我相公

主上聖明不爲忌者之言舍賢相不用雖帝堯
知人之明亦不過此矣吾鄉自楊文敏後相業
無聞今茲簡在當繹思素懷忠義之旨益
求報補蓋因人言而意氣激昂者非也因人言
而隨俗轉移者亦非也某沉迷簿書間方因病

求去何敢談天下大事然仰望相公樹光明俊偉之業爲吾閩山川生色則此心終惓惓耳仰體清節不敢以寸幣爲賀惟進其愚言想台慈能信之也

東于穀峰相公

領節臨藩忽周六載尸位之誚夙夜匪忘雖陳考績之章實附乞身之請幸而得遂則縱麋鹿于豐草可任優游苟不從心則騁駑駘于末途且復蹙蹙顧自分既審求退未已則以負乘見

進者或以知止見原不任之罪庶可末減乎老
先生方際會風雲沐浴日月進退百僚陶冶萬
彙一言弘獎華袞不足爲榮數字誤褒丘山有
難比重若乃贈以章服寵以彝尊此宰相之殊
禮藩吏之極榮也某何人斯可以當此九頓登
嘉未敢方命容馳一介踵門叩謝曷勝感戢之
至

又

修顏廟碑銘自是千古一大文字須令鍾王執

筆方可垂之琬琰奈世鮮其人一二縉紳以書
法著名者又如王子敬可使書羊欣之裙而不
可使書太極殿之扁故假手杜生謂其楷法精
細稍便青衿効法而已過蒙獎飾非所敢當也
登州有蘇長公海市圖及詩和者甚衆欲重勒
之然此生畏熱艱于遠行業已飄然南旋不能
爲蓬萊閣結一段勝緣也刻手有一沈生在此
原非從吳刻石攜至者貴門生邢子愿或未之
知此君草書逼真二王文章高出六朝二十年

林下無人起用茲座師作相乃彼彈冠相慶之時也

東鄭崑岩中丞

往讀佳集及諸籌邊疏深嘆人才難得邊事久
壞而曉暢戎務深懷遠圖者莫如臺下方期以
著績華夷流光竹素爲國家建百年無事之
計不謂方至平城卽已遘疾壯志未酬乞身而
歸功名建立莫不有數可勝嘆哉然今日事勢
任事實難言官權重制府權輕設施未竟議論

易馬集 卷之三十一
已至繫騏驥之足而縛賁育之手欲其馳騁奮
發必不能矣臺下飄然引疾而去使利族無所
復施銜蘆無所復事明哲保身不爲不快也某
倦飛已久病體相同方躡高蹤思全末路未知
歸期定于何日耳

札濟寧州

霖雨異常濟兗東三郡見在水中頽屋沉竈濡
首滅頂者共六十餘州縣非如黃河之決僅四
州縣被淹猶可移彼救此稍得全活也雖行道

府欲查搜倉穀庫藏爲分甘絕少計然河工三
舉所在如掃各邑自救不暇安能救人斯亦危
急存亡之秋也已奏乞發內帑恐亦終成畫
餅錢糧暫停徵不可如常催併姑俟從容圖之
不佞欲以一手獨障江河能乎哉可付長嘆

東曹嗣山總河

積雨踰月百川湧沸以衣帶黃河納天下水之
半豈不溢出至于黃堎口故道則河伯素所經
行賈魯劉忠宣俱嘗濬之異時道府竊議謂開

此口則河不必治 陵固無傷運亦不害奈中
州諸公不欲水經宋地唱爲侵 祖陵之說以
聳動 聖心必欲開王家口下李吉口堅城集
乃快其意此一方之偏論非天下之公言也今
雖稍決然大勢尚歸朱旺新河則水退塞之亦
易爲力萬一難塞雖畱之以殺水勢亦自不妨
蓋舊時借黃爲運道徐邳乾涸則漕舟難行今
已有加河不假手河伯矣何苦拂逆水性強之
北行符離在泗州之北二百餘里水出宿遷小

河口子 祖陵何與而藉口侵 陵誣矣此番
太水實乃大意非人力之所能爲同在地方利
害相關敢不慎密以副台命謹啓

啓葉相公

頃承大教深憂輔弼之難知係衷言實出遠慮
昔日諸公惟不憂其難故不能盡忠極慮以匡
國家反懷私圖樹黨求勝使功名損于末路物
望孤于曩時相公之憂及此所謂旣知其難則
易者至矣惟是海內民窮財盡今歲水災跨都

連省木棲水處之民豈堪供輸貢稅而邊餉
國費急于星火郡國倉庾搜括如洗縱懷百憂
難展一籌自古國家之亂皆由數千里水旱
無以救之盜賊乘之而起漢之黃巾唐之芝巢
可爲明鑒須二三相公轉移聖心代處邊餉
弘施救濟庶幾可收拾耳此腹心元氣之論非
虛談也行道艱難小民困苦之狀想在台炤流
民圖貴邑前輩事也令人追慕不已

東楊止菴少宰

頃接邸報見貴部覆某六年考滿擬加部銜誤
被 聖恩陞貳司馬仍舊巡撫自惟待罪多年
臯盤山積不蒙罷斥已爲厚幸乃假以華袞褒
其任事卽協濟河工調停礦稅皆職分當爲何
足以掛齒頰而獎飾過當侈爲美談遂得增秩
兼官求退反進策驚駘以遠到許短翮以高翔
雖自知其不能亦翹然而私喜此非老先生特
達之知不以庸衆相視安敢望課功于論罪之
日割榮於遠辱之時哉感激高情直銘五內不

知所報惟有勉自樹立以不負推轂庶幾酬德于異日耳

答張滄州親丈

夏初得報知榮選滄州旋見撫按畱用原守疏而部中久不覆知親翁未免稍候以全遜讓之誼乃至秋來竟無音耗亦意親翁當往視事矣滄州瀛海重地州守職在親民若加意吏治爲民造福便可垂不朽之名不佞初試亦爲此官雖勉自砥礪然從今思之少年行事尚未盡當

蓋追徵詞訟乃有司二大要領追徵不在鞭朴
宜用鼓舞完負之數每比須自記之不可開自
吏書問理須虛心隔別研審不可寄耳目于人
小事當速爲決斷勿久滯累民至于喜怒之際
刑罰易偏囹圄之中每多冤死戒之慎之勿復
輕加于民所當嚴以待之者衙門人役而已千
緒萬端總不出清愼勤三字親翁年方強仕徒
以親老不能待一第勉就此官前途尚遠惟在
勵志于始耳不佞以六載上計叨增一秩循分

已逾終當爲求退計時當災沴未敢言也

答朱蓼水太史

不佞俗吏也起家州郡于民間疾苦頗能知之
然格于時勢拘于文法未能爲民興利除害卽
時有所區畫正如升斗之水稍濟枯鱗欲以議
于汪濊之澤何有哉六載上計放黜是甘忽有
增秩之命此皆齊之先生長者假以齒頰俾
得匿其大過見其微長冒茲榮階逾于所望每
一慮至汗流沾背門下新奉 絲綸造士畱都